

Ի Գ .

Ով զիս կըտրատե մորթե կարկոծե, իմ կես հախըն չէ.
Աչերս ի՞նչ տեսաւ ի քեզ, որ իմ սիրտս ըզքեզ կու սիրե:
Ոչ ունիմ համբերութիւն, որ լըսեմ սահաթ մի քենէ.
Յանցեղ եմ ի քո սիրուդ՝ զինչ ամառ ծաղիկն ի ջըրէ:

Ի Դ .

Պիտեր ինձ հազար մաքի, հազարին եաթաղն ապիկի.
Պիտեր ինձ հազար ջորի ու հազարին բեռնակն ալ ոսկի.
Պիտեր ինձ ծովեր գինի ու նաւերդ ինձ տօստօքանի.
Իմ եարն ալ իմ քովս ըլնար, խըմեաք տարեկ մի քանի:

ԵՐԵՍՈՒՆԵՐՈՐԴ ՏԱՂԱՇԱՐՔ

Ա

Ա՛յ իմ մարգըրտե շարոց, ոսկեթել ծածկոցդ ի վերայ,
Չքո հայրըն պատիւ ձենեմ, քեզ ինձի կ'ուզեմ՝ թէ կուտայ:
–Կըտրի՛ճ, մի՛ անխելանար, թէ հազար ուզես՝ նա չիտայ.
Ծողըդ լի ոսկւով արա՛, եկո՛ մեր դուռըն խաղ արա՛,
Չիմ հայրս պարտական արա՛, դու կանգնե՛ զինչ քուրդ հաւալայ.
Ես իմ հորըս հետ կըռուիմ, թէ՛ Գընա՛ պարտքիդ ճար արա՛.
Մայրըս քեզ բարձ դընէ, դու նըստիս զինչ բարձր ամիրայ,
Ձեռքըդ բըռնեմ ներս տանիմ, դուռն դընեմ՝ ըզփակն ի վերայ,
Ապրիշում խալի ձըգեմ, ոսկեթել դօշակն ի վըրայ,
Բարձիկ մ'ի սեղան բերեմ, որ խորված կաքանն ի գըրայ,
Չուզում իմ գինի բերեմ, որ խըմենք ի սիրոյ վըրայ:

Բ .

Ասի թէ սիրեմ ըզքեզ, դու ի քեզ ի նազն Է՞ր ելար,
Քա՛ւ ալ թէ անցաւ աշխարհս, որ այլ տեղ չըայ սիրոյ ճար.
Երթամ մեկնիմ ա՛յլ սիրեմ որ աչուին ի քեզ նըմանի.
Չանունըդ նոր դընեմ, որ լըսես՝ սի՛րտըդ նըւաղի:

Գ .

Թէ նուշի ՚իր աչացս ելար, թէ շաքարն՝ անպիտանացար.
Թէ դուն՝ սիրելու խընձորն, ա՛լ իմ ա՛չքըս մի՛ երեւնար:
Երթամ սուրբ Սարգիս մըտնում, անիծեմ որ դուն իմանաս,
Ո՛չ կաղնաս ու ո՛չ կուրնաս, սարկարտան մընաս քան ըզիս: